

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko–dobojskog kantona”, broj: 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko–dobojskog kantona, na 38. sjednici, održanoj 30.12.2015. godine, d o n o s i

ZAKLJUČAK

I.

Utvrđuje se Prijedlog Odluke o prihvatanju kreditnog zaduženja Zeničko-dobojskog kantona za potrebe realizacije projekta „Izgradnja regionalnog vodovoda Plava Voda“.

II.

Prijedlog Odluke iz tačke I. ovog Zaključka sa priložima upućuje se u skupštinsku proceduru.

III.

Zaključak stupa na snagu danom donošenja.

Broj: 02-14-22923/15.
Datum, 30.12.2015. godine
Zenica

PREMIJER

Miralem Galijašević

DOSTAVLJENO:

1x Stručna služba Skupštine,
1x Ministarstvo za poljoprivredu, šumarstvo i vodoprivredu,
1x a/a.

Na osnovu člana 37 stav 1. tačka g) Ustava Zeničko-dobojskog kantona, člana 67. Zakona o budžetima u Federaciji Bosne i Hercegovine („Službene novine Federacije BiH“, broj: 102/13, 9/14 i 13/14, 8/15 i 91/15), a u vezi sa članom 38., 40. i 41. Zakona o dugu, zaduživanju i garancijama u Federaciji Bosne i Hercegovine („Službene novine Federacije Bosne i Hercegovine“, broj: 86/07, 24/09 i 44/10), Skupština Zeničko-dobojskog kantona na ___sjednici, održanoj dana _____. godine, d o n o s i:

O D L U K U

**O DAVANJU SAGLASNOSTI NA ZADUŽENJE ZENIČKO-DOBOJSKOG KANTONA
PO UGOVORU O ZAJMU ZAKLJUČENOG IZMEĐU BOSNE I HERCEGOVINE I
EVROPSKE BANKE ZA OBNOVU I RAZVOJ (EBRD) I BOSNE I HERCEGOVINE I
EVROPSKE BANKE VIJEĆA EVROPE (CEB) ZA PROJEKAT „IZGRADNJA
REGIONALNOG VODOVODA PLAVA VODA“**

Član 1.

(Saglasnost na zaduženje)

Daje se saglasnost na zaduženje Zeničko-dobojskog kantona prema Federaciji Bosne i Hercegovine, (u daljem tekstu: Federacija), u ukupnom iznosu od **3.850.000,00 EUR-a** i to po osnovu kredita Evropske banke za obnovu i razvoj, (u daljem tekstu: EBRD), u iznosu od **1.925.000,00 EUR-a** i po osnovu kredita Razvojne banke Vijeća Evrope, (u daljem tekstu: CEB), također u iznosu od **1.925.000,00 EUR-a** za realizaciju Projekta „Izgradnja regionalnog vodovoda „Plava voda“.

Član 2.

(Namjena kreditnih sredstava)

Kreditna sredstva iz člana 1. ove Odluke namijenjena su za finansiranje Projekta „Izgradnja regionalnog vodovoda Plava voda“, čiji je osnovni cilj i svrha osiguranje pouzdanog, dugoročnog i kvalitetnog snabdijevanja vodom, putem regionalnog sistema vodosnabdijevanja za općine: Travnik, Zenica, Novi Travnik, Vitez i Busovača zahvatanjem vode iz izvorišta „Plava voda“ lociranog u općini Travnik.

Član 3.

(Visina kreditnih sredstava)

Kreditna sredstva iz člana 1. ove Odluke čine **17,50%** od ukupnog kreditnog zaduženja svih subjekata od 22.000.000,00 EUR-a, od čega ukupno kreditno zaduženje kod EBRD-a iznosi **11.000.000,00 EUR-a**, a ukupno kreditno zaduženje kod CEB-a također iznosi **11.000.000,00 EUR-a**.

Član 4.
(Učešće subjekata u povratu ukupnog zaduženja)

Učešće pojedinih subjekata u povratu ukupno zaduženih sredstava od 22.000.000,00 EUR-a je sljedeći:

- Fond za zaštitu okoliša Federacije BiH	5.500.000,00 EUR-a	ili	25,00 %
- Zeničko-dobojski kanton	3.850.000,00 EUR-a	ili	17,50 %
- Grad Zenica/JKP	7.621.000,00 EUR-a	ili	34,64 %
- SBK	1.650.000,00 EUR-a	ili	7,50 %
- Općina Novi Travnik	1.276.000,00 EUR-a	ili	5,80 %
- Općina Vitez	757.000,00 EUR-a	ili	3,44 %
- Općina Busovača	1.346.000,00 EUR-a		6,12 %
U K U P N O:	22.000.000,00 EUR-a	ili	100%

Član 5.
(Uslovi otplate kredita)

Kreditna sredstva iz člana 1. ove Odluke, prihvataju se pod sljedećim uslovima:

Za kreditna sredstva EBRD-a uslovi su sljedeći:

- a) Iznos kredita koji se traži: 1.925.000,00 EUR-a,
- b) Rok otplate: 15 godina,
- c) Greis period: 3 godine,
- d) Kamata: šestomjesečni EURIBOR plus marža od 1% godišnje,
- e) Jednokratna provizija: 1% na iznos glavnice zajma,
- f) Provizija na raspoloživi iznos zajma: 0,5% godišnje na nepovučeni iznos zajma.

Za kreditna sredstva CEB-a uslovi su sljedeći:

- g) Iznos kredita koji se traži: 1.925.000,00 EUR-a,
- h) Rok otplate: do 20 godina (uključen grace period),
- i) Greis period: do 5 godina,
- j) Valuta povlačenja: EURO ili USD,
- k) Kamatna stopa: bit će fiksirana posebno za svaku tranšu povlačenja, a zavisi od valute povlačenja svake tranše kredita, od iznosa svaketranš, kao i za razdoblja otplate. Za povlačenja izvršena u EUR-ima primjenjivat će se EURIBOR, odnosno USD-LIBOR za povlačenje u USD.

Član 6.
(Prenos kreditnih sredstava i ovlaštenje za potpisivanje posebnih podugovora)

(1) Kreditna sredstva iz člana 1. ove Odluke, Federacija Bosne i Hercegovine će posebnim podugovorom prenijeti na Zeničko-dobojski kanton.

(2) Za potpisivanje posebnih podugovora o prenosu kreditnih sredstava po Projektu iz člana 1. ove Odluke, između Federacije Bosne i Hercegovine i Zeničko-dobojskog kantona ovlašćuje se Premijer Zeničko-dobojskog kantona.

Član 7.

(Način naplate dospjelih obaveza i obaveze Zeničko-dobojskog kantona)

(1) U svrhu redovne otplate kredita, Zeničko-dobojski kanton je saglasan da Federacija Bosne i Hercegovine, u slučaju neredovnih ispunjenja obaveza po Kreditu, bez upozorenja može dospjele obaveze direktno naplatiti sa računa javnih prihoda, i to iz dijela prihoda koji pripadaju Zeničko-dobojskom kantonu.

(2) Zeničko-dobojski kanton se obavezuje da će u svrhu naplate svih potraživanja po ovom Kreditu, Federaciji Bosne i Hercegovine dostaviti bjanko mjenice, kojim Zeničko-dobojski kanton ovlašćuje Federaciju Bosne i Hercegovine da primljene bjanko mjenice može koristiti za naplatu dospjelog potraživanja.

Član 8.

(Međusobna prava i obaveze)

Međusobna prava i obaveze po ovom kreditnom zaduženju između Zeničko-dobojskog kantona, subjekata koji učestvuju u povratu i krajnjih korisnika kreditnih sredstava, bit će uređene posebnim ugovorima.

Član 9.

(Osiguranje Budžetskih sredstava)

U periodu dospjeća obaveza po kreditu, potrebno je osigurati sredstva iz Budžeta Zeničko-dobojskog kantona za izmirenje dospjelih obaveza.

Član 10.

(Korištenje sredstava vodnih naknada)

Za povrat kreditnih sredstava iz člana 1. **(3.850.000,00 EUR-a)** koristit će se sredstava vodnih naknada koja pripadaju Gradu Zenica, shodno Programu utroška sredstava vodnih naknada. Ukoliko sredstva vodnih naknada koja pripadaju Gradu Zenica budu niža po navedenom kreditu od iznosa godišnje obaveze, Grad Zenica je dužan razliku sredstava refundirati Zeničko-dobojskom kantonu.

Član 11.

(Realizacija Odluke i izvještavanje)

(1) Za realizaciju ove Odluke i Izvještavanje zadužuje se Ministarstvo finansija i Ministarstvo za poljoprivredu, šumarstvo i vodoprivredu Zeničko-dobojskog kantona, svako u okviru svoje nadležnosti.

(2) Ova Odluka će se dostaviti Federalnom ministarstvu finansija na dalje postupanje.

Član 12.
(Stupanje na snagu Odluke i objavljivanje)

Ova Odluka stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: _____
Datum: _____
Z e n i c a

PRESJEDAVAJUĆA

O b r a z l o ž e n j e

I – PRAVNI OSNOV ZA DONOŠENJE

Pravni osnov za donošenje Odluke o davanju saglasnosti na zaduženje Zeničko-dobojskog kantona po Ugovoru o zajmu zaključenog između Bosne i Hercegovine i Evropske banke za obnovu i razvoj (EBRD), te Bosne i Hercegovine i Evropske banke Vijeća Evrope (CEB) za projekat „Izgradnja regionalnog vodovoda Plava Voda“, (u daljem tekstu: Odluka), sadržan je u odredbi člana 37 stav 1. tačka g) Ustava Zeničko-dobojskog kantona, člana 67. Zakona o budžetima u Federaciji Bosne i Hercegovine („Službene novine Federacije BiH“, broj: 102/13, 9/14 i 13/14, 8/15 i 91/15) a u vezi sa članom 38., 40. i 41. Zakona o dugu, zaduživanju i garancijama u Federaciji Bosne i Hercegovine („Službene novine Federacije Bosne i Hercegovine“, broj: 86/07, 24/09 i 44/10),

II – RAZLOZI ZA DONOŠENJE

Javno preduzeće Regionalni vodovod „Plava voda“ d.o.o. Travnik dana 09.10.2015. godine, podnio je Premijeru Zeničko-dobojskog kantona zahtjev za dobijanje odluke Skupštine kantona za kreditno zaduženje. U prilogu zahtjeva dostavljen je Nacrt Odluke Zeničko-dobojskog kantona koji objedinjuje zaduženja kod Evropske banke za obnovu i razvoj (EBRD) i Razvojne banke Vijeća Evrope (CEB).

Ideja o implementaciji Projekta „Plava voda“ datira iz 80-tih godina, a sve u cilju dugoročnog rješavanja vodosnabdijevanja općina Travnik i Zenica. Kao zainteresovane strane u projekat su se uključile i općine Novi Travnik, Vitez i Busovača.

U Informaciji o projektu „Plava voda“ koji se nalazi u prilogu, dat je kratak historijat projekta, počev od 80-tih godina prošlog vijeka i pregled aktivnosti koje su nastavljene poslije 2000. Godine do danas. U informaciji je dat pregled aktivnosti do 23.11.2015. godine, od kojih su najznačajnije: preregistracija i uspostava preduzeća JP RV „Plava voda“ d.o.o. Travnik, riješeno pitanje koncesije nad izvorištem „Plava voda“ na federalnom nivou, izrađen Idejni i Glavni projekat, pribavljeno niz saglasnosti i odobrenja nadležnih organa, na osnovu kojih je Federalno ministarstvo prostornog uređenja 24.04.2014. godine izdalo „Načelno odobrenje za građenje složene infrastrukture građevine regionalnog vodovoda „Plava voda“ sa rokom važenja od 5 godina, izrađen „Elaborat ekspoprijacije“ i „Elaborat o zaštiti izvorišta Plava voda“, instalirana mjerna stanica za mjerenje vodostaja, te proveden niz aktivnosti na osiguranju finansijskih sredstava za implementaciju projekta, uključujući komunikaciju sa zainteresiranim stranama i informisanje javnosti.

Pored nabrojanih aktivnosti izdvojićemo i sledeće realizovane aktivnosti bitne za ovaj projekat:

- Vlada Zeničko-dobojskog kantona donijela je Zaključak broj: 02-25-19306/12 od 04.09.2012. godine, o opravdanosti izgradnje regionalnog vodovoda „Plava voda“ na području općine Zenica.
- Vlada Srednjobosanskog kantona donijela je Zaključak broj: 01-05-524/12-22 od 24.09.2012. godine, o pravdanosti izgradnje regionalnog vodovoda „Plava voda“ na području općina Travnik, Novi Travnik, Vitez i Busovača.
- Vlada Federacije BiH je donijela Odluku o utvrđivanju javnog interesa za izgradnju regionalnog vodovoda „Plava voda“ (Broj 26/13 Od 10.01.2013. godine).
- Učesnici u projektu, odnosno predstavnici općina, kantona i institucija podnijeli su 31.03.2014. godine zahtjev Evropskoj banci za razvoj (EBRD) i Razvojnoj banci Vijeća Evrope (CEB) zahtjev za odobrenje kreditnih sredstava i to u iznosu od 11 miliona EUR od EBRD-a i 11 miliona EUR od Razvojne banke Vijeća Evrope. U zahtjevu je iznešen prijedlog preuzimanja kreditnog zaduženja i servisiranja kredita, u kojem je navedeno da bi se 50% kredita servisiralo iz vodnih naknada dva kantona i Fonda za okoliš FBiH, direktnim plaćanjem na račun JP RV „Plava voda“, a drugih 50% kredita bi vratila četiri općinska komunalna preduzeća uz garanciju plaćanja od relevantnih općina. Općina Travnik, budući da na dugoročno raspolaganje stavlja važan prirodni resurs, neće sudjelovati u servisiranju duga.
- Nacrti osnovnih uvjeta zajma kod Evropske banke za obnovu i razvoj dana 31.03.2015. godine parafirani su od strane svih učesnika u projektu.
- Na 10. Sjednici Vlade Zeničko-dobojskog kantona, održanoj dana 13.05.2015. godine, donešen je Zaključak o davanju prethodne saglasnosti za zaduženje Zeničko-dobojskog kantona za realizaciju navedenog projekta i podržala inicijativu pokretanja procedure kreditnog zaduženja kod EBRD-a.
- Na 16. sjednici Vlade Zeničko-dobojskog kantona, održanoj dana 11.06.2015. godine donešen je Zaključak o davanju prethodne saglasnosti za zaduženje Zeničko-dobojskog kantona za realizaciju navedenog projekta i podržala inicijativu pokretanja procedure kreditnog zaduženja kod CEB-a.
- Zaključcima je definisano da konačnu odluku o zaduženju Zeničko-dobojskog kantona donosi Skupština Zeničko dobojskog kantona, po okončanju pregovora na nivou Bosne i Hercegovine sa EBRD-om i CEB-om.
- Skupština Srednjobosanskog kantona, dana 28.10.2015. godine, donijela odluku o prihvatanju zaduženja po Ugovoru o zajmu između BiH i EBRD-a i Ugovora o zajmu između BiH i CEB-a.

Dana 22.10.2015. godine Ministarstvo za poljoprivredu, šumarstvo i vodoprivredu Zeničko-dobojskog kantona dobilo je odgovor od strane Federalnog ministarstva poljoprivrede,

vodoprivrede i šumarstva vezano za naš upit od 16.10.2015. godine a po pitanju mogućnosti utroška sredstava od vodnih naknada koje pripadaju kantonu za otplatu kredita uzetog za izgradnju regionalnog vodovoda „Plava voda“ i mogućnošću rezervisanja sredstava prema otplatnom planu na period do 20. godina. U odgovoru se navodi da se sredstva vodnih naknada mogu koristiti za otplatu kredita za izgradnju regionalnog vodovoda „Plava voda“ i da se navedena stavka treba planirati u programu ministarstva. Ministarstvo za poljoprivredu, šumarstvo i vodoprivredu se nije izjasnilo o rezervisanju sredstava iz vodnih naknada na period do 20. godina jer visina prihoda zavisi od zakonskih rješenja .

Povrat kredita planiran je iz sredstava vodnih naknada koje po godišnjem programu pripadaju Gradu Zenica i iste će biti evidentirane u programu. U slučaju da Obaveze po kreditu prelaze iznos dijela vodnih naknada koje pripadaju Gradu Zenica, općina je dužna prema Budžetu Zeničko dobojskog kantona izvršiti refundiranje nedostajućeg iznosa .

IV - POSTUPAK DONOŠENJA

Imajući u vidu navedeno predlažemo Vladi Zeničko-dobojskog kantona da donese zaključak o davanju saglasnosti na Prijedlog Odluke o davanju saglasnosti na zaduženje Zeničko-dobojskog kantona po Ugovoru o zajmu zaključenog između Bosne i Hercegovine i Evropske banke za obnovu i razvoj (EBRD), te Bosne i Hercegovine i Evropske banke Vijeća Evrope (CEB) za projekat „Izgradnja regionalnog vodovoda Plava Voda“ i isti dostavlja u dalju redovnu skupštinsku proceduru, na davanje saglasnosti Skupštine na zaduženje Zeničko-dobojskog kantona.

V – DODATNA FINANSIJSKA SREDSTVA ZA DONOŠENJE ODLUKE

Za donošenje ove Odluke u Budžetu Zeničko-dobojskog kantona nije potrebno osigurati dodatna finansijska sredstva.

O b r a đ i v a č:

**Ministarstvo za poljoprivredu,
šumarstvo i vodoprivredu**